

Tico Croes ta splica cu Nel Oduber no ta compronde pakico el a worde eligi

ENBEZ DI GOBERNA NEL ODUBER TA ATACA PUEBLO Y OTRO PAISNAN

ORANJESTAD (AAN): "Tur siman Promer Ministro Oduber sa di descubri algo pa ataca Pueblo cune. Siman pasa ademas el a dicidi di bay ataca otro paisnan loke lo bay crea mas problema pa Aruba."

Declaracion di Tico Croes kende a musta cu e ta lamenta cu Promer Ministro Nelson Oduber no ta comprende cu el a worde eligi pa trece solucionnan pa e pais y sigui eleva e nomber di Aruba internacionalmente.

Segun Tico Croes loke Promer Ministro Oduber ta haci awor ta completamente contrario na loke su tarea mester ta como Promer Ministro. No tin un siman ta pasa cu Promer Ministro Nelson Oduber no a inventa otro

asunto pa ataca Pueblo cune.

Promer Ministro Oduber a declara cu tur Arubiano ta den droga. El a acusa Arubianonan ta di comete actonan di sinvergonzura na Hulanda. Promer Ministro a rabia pasobra Arubianonan por bay Hulanda pa-poco placa. Nelson Oduber a acusa Arubianonan di ta bay susha Serro Colorado. Ora e Promer Ministro mester a defende trahadornan el a laga sa cu nan ta gana mucho placa.

"Ta algo increible ta pasa. Enbez di asumi su responsabilidad y para pa valornan e Promer Ministro ta acusa y ta sundra" Tico Croes a trece dilanti.

El a referi na e articulo cu a sali awor publica den e co-

rant Hulandes Telegraaf y cu ta prueba cu pa keda na poder Nelson Oduber no ta considera ni e nomber ni e dignidad di Aruba importante.

Na vispera di eleccion e Promer Ministro ta haci uso di tacticanan sushi di costum-

ber pa bay causa daño na henter Aruba den vista di mundo. Cu su declaracionnan e Promer Ministro a haci daño na henter turismo di Aruba y a pone e clima di inversion na peligro.

"Mientras AVP ta trata di

sigui eleva Aruba y ta tre dirigentenan politico renombrado pa Aruba pa duna reconocimiento na e pais e Gobierno di Promer Ministro Oduber ta pone e dignidad y orgullo di Aruba un banda" Tico Croes a conclui.